

徐霞客遊記大觀

上海掃葉山房發行

卷之三

上古考略

徐霞客遊記大觀卷八

江陰徐宏祖霞客著

子別姓 寄介立 輯

滇遊日記二

戊十月初一日。凌晨起。晴爽殊甚。從三家村啜粥啟行。即西由峽中。已乃與溪別。復西逾嶺。共三里。入報恩寺。仍轉東。二里過松花壩橋。又循五龍山而南。三十里。循省城東北隅南行。已乃轉西。度大橋。則大溪之水自橋而南。經演武場。而出火燒鋪橋下南壩矣。從橋西入省城東門。飯於肆。出南門。抵向所居停處。則吳方生方出遊歸化寺未返。余坐待之。抵暮握手。喜可知也。見有晉寧歌童王可程以就醫隨吳來始知方生在唐守處遇中秋甚洽也。

初二日。余欲西行。往期阮仁吾所倩擔夫。遇其姪阮玉灣。阮穆聲詢候甚篤。下午阮仁吾至寓。以擔夫楊秀雇約至。余期以五日後再往晉寧。還即啟行。仁吾贍以番帨香扇。

初三日。余欲往晉寧。與唐元鶴州守大來隱君作別。方生言二君日日念君。今日按君還省。二君必至省謁見。毋中途相左也。盍少待之。乃入叩玉灣。并叩楊勝寢。知麗江守相望已久。既而玉灣來顧寓中。知按君調兵欲征阿迷。然兵未發而路人皆知之。賊黨益猖狂於江川澂江之境矣。玉灣謂余。海口有石城妙高。相近有別墅。已買

山欲營構為勝地。請備車馬同行一觀。余辭以晉寧之行不容遲。因迤西之期久也。又曰。緬甸不可不一遊。請以騰越莊人為導。余領之。

初四日余束裝欲蚤往晉寧。主人言薄暮舟乃發。不若再飯而行。已而阮玉灣餽檳酒。與吳君共酌之。下午由羊市直南六里抵南壩下渡舟。既暮乃行。是晚西南鬪風。舟行三十里。至海夾口泊。三鼓乃發棹。昧爽抵湖南涯北圩口。乃觀音山之東南瀕海處。其涯有溫泉焉。舟人有登浴者。余畏風寒不及沐也。於是挂帆向東南行二十里。至安江鄉。梳櫛於飯肆。仍南四里。過一小橋。即西邨四通橋分注之水。為歸化晉寧分界處。又南四里。入晉寧州北門。皆昔來暗中所行道也。至是始見田疇廣闊。城樓雄壯焉。入門。門禁過往者不得入城。蓋防阿迷不靖也。既見大來。各道相思甚急。飯而入叩州尊。如慰饑渴。遂留歡晏。夜寢於下道供帳極鮮整。

初五日至初七日。日日手談內署。候張調治。黃從月。黃沂水。禹甸。與唐君大來。更次相陪。夜宴必盡醉乃已。

初八日。飲後與黃沂水出西門。稍北過陽城堡。即所謂古土城也。其西北為明惠夫人廟。廟祀晉寧州刺史李毅女。夫人功見一統志。有元碑。首句云。夫人姓楊氏。名秀娘。李毅之女也。既曰李女。又曰姓楊。何謬之甚耶。豈夫人之夫乃姓楊耶。然辭不達。

甚矣。人傳其內猶存肉身。外加髹焉。故大倍於人。余不信。沂水云。昔年鼠傷其足。露骨焉。不妄也。是日州幕傅良友來拜。且餽榼醴。傅江西德化人。

初九日。余病嗽。欲發汗。遂卧下道。

初十日。嗽不止。仍卧下道。唐君晨夕至榻前。邀諸友來看。極殷繾。

十一日。余起。復入內署。蓋州治無事。自清晨邀以入。深暮而出。復如前焉。是日。傅幕復送禮。余受其雞肉。轉寄大來處。下午。傅幕之親姜廷材來拜。姜全谿人。

十二日。唐州尊餽新製長褶棉被。余入謝。并往拜姜於傅署。遇學師趙。相見靄靄。及

往拜趙於學齋。遇楊學師。交相拜焉。詢趙師。陸涼有何君巢阿否。趙陸涼人。故詢之。趙言陸

涼無之。當是浪穹人。然同宦於浙中。相善。趙君陞任於此。過池州。問六安何州君。已

丁艱去矣。四月初至鎮遠。其所主之家。即何所先主者。是其歸已的。但余前聞一僧。先主鎮遠。期計之。似當其時。心甚惴惴。無可質問也。從陳木叔集中。轉得二知己為吳太史淡人。及何六安巢阿。俱

不及面。豈淡人為大斃於長安。今又自此水阨。若果爾。何遇之奇也。

十三日。州尊赴楊貢生酌。張調治以騎遨遊金沙寺。以有莊田在其西麓也。出西門。見門內有新潤之房頗麗。問之。即調治之兄也。名曰口。以鄉薦任常州判甫。自今春抵家。以譏與調治不睦。出西

門直西行田塍中。路甚坦。其塢即南自河澗鋪直北而出者。至此乃大開洋。北極於滇池焉。西界山東突瀕塢者為牧羊山。北突而最高者為望鶴山。其北走之餘脈為天城。又西為金沙。則散而瀕海者也。東界山西突而屏城南者為玉案山。北峙而最高者為盤龍山。其環北之正脊為羅藏山。則結頂而中峙者也。州治倚東界之麓。大堡河澗合流於西界之麓。北出四通橋。分為兩流。一直北下滇海。一東遶州北入歸化界。由安江鄉入滇海。經塢西行三里。上溪堤有大石梁跨溪上。是為四通橋。由橋西直上坡為昆陽道。西北由岐一里半。為天女城。上有天城門遺址。古石兩臺。如雕刻亭簷狀。昔李毅之女秀。代父領鎮時。築城於此。故名。城阜斷而復起。西北瀕湖者。其山長遠。為黃洞山。西南竝天城而圓聳夾峙者。為金沙江山。此皆土山斷續。南附於大山者也。金沙之西。則滇海南激而入。直逼大山。金沙之南。則望鶴山高擁而北瞰。為西界大山。北隅之最。其西則將軍山聳崖突立。與望鶴駢峙而出。第望鶴則北臨金沙。天城將軍則北臨滇海耳。黃洞山之西有洲。西橫海中。居廬環集其上。是為河泊所。乃海子中之蝎居也。今已無河泊官。而海子中渡船猶泊焉。其處正西與昆陽對。截河西渡。止二十里。陸從將軍山遶湖之南。其路倍之。由天女城盤金沙江北夾。又一里半而入金沙寺。寺門北向。盤龍蓮峯師所建也。寺頗寂寞。由寺後拾級而上。

為玉皇閣。又上為真武殿。俱軒敞而北向。瞻湖得海。天空闊之勢。山之西麓。則連邨
倚曲。民居聚焉。入調治山樓。飯而登山。凭眺寺中。下步田畦水曲。觀調治家人築塲
收穀。戴月入城。皎潔如晝。而寒悄逼人。還飯下道。不候唐君而卧。唐君夜半乃歸。使人相問。余已在夢矣。

魂中

十四日在署中。

十五日在州署。夜酌而散。復出訪黃沂水。其家寂然。花陰歷亂。惟聞犬聲。還步街中。
恰遇黃。黃乃呼酒。踞下道門。當月而酌。中夜乃散。

十六日。余欲別而行。唐君謂連日因歌童就醫未歸。不能暢飲。使人往省召之。為君
送別。必少待之。余不能却。

十七十八日在州署。

十九日在州署。夜月皎而早陰霽。

二十日二十一日在州署。兩日皆倏雨倏霽。

二十二日。唐君為余作瘞靜聞骨記。三易稿而後成。已乃具酌演優。并候楊趙二學
師。及唐大來。黃沂水。昆仲。為同宴以餞。

二十三日。唐君又餽棉襖夾褲。其厚贍焉。唐大來為余作書文甚多。且寄閃次公書。

亦以青蚨贐。乃入謝唐君為明日早行計。晉寧乃滇池南一塢稍開。其界西至金沙江山。沿將軍山抵三尖邱。與昆陽界。不過二十里。東至盤龍山頂。與澂江界。不過十里。北至分水河橋。與歸化界。不過五里。南入山塢。與澂江界。不過十里。總計南北不過十五里。東西不過三十里。不及諸蠻酋山徼一曲也。晉寧之水惟四通橋為大。其內有二溪。俱會於牧羊山下石壁邱。一為大壩河。即河澗鋪之流。出自關索嶺者。余昔往江川由之一為大甫河。出自鐵爐關者。與新興分水之嶺界。二水合而出四通橋。又分其半。東灌州北之田。至州東北。又有盤龍山澗之水。自州城東南隅循城北流。引為城濠。而下合於四通東灌之水。遂北為歸化縣分界。而出安江鄉。其河乃唐公新濬者。晉寧二屬邑。俱在洲東北境。亦滇海東南之餘塢也。歸化在州北二十里。呈貢又在歸化北四十里。呈貢北即昆明縣界。東即板橋路。東即宜良界。東南即羅藏山陽宗界。歸化北五里。有蓮花洞山。一名龍洞。有水出其間。羅藏山在歸化東十里。盤龍山東北之主峯也。東南距澂江府四十里。其山高聳。總挈眾山。與邵甸之梁王山對。亦謂之梁王山。以元梁王結寨其上也。西北麓為滇池。東南麓為明湖。撫仙湖。水之兩分其歸者。以此山為界。水之三匯其壑者。亦以此山為環然則比邵甸梁王。此更磅礴矣。其脈自鐵爐關東度為關索嶺。又東為江川北屈頸巔山。遂

北走為此山。又東至宜良縣西境。又北度楊林西嶺。又北結為邵甸梁王山。而為果馬月狐之脊焉。晉寧四門。昔皆傾圮。唐元鶴蒞任。即修城建樓。極其壯麗。晉寧東至澂江六十里。西至昆陽四十里。南至江川七十里。北至省會一百里。東南至路南州一百五十里。東北至宜良一百六十里。西南至新興州一百二十里。西北至安寧州一百二十里。唐晉寧初授陝西三水令。以禦流寇功。即陞本州知州。以憂歸補。任於此。乃郎年十五歲。文學甚優。落筆有驚人語。餘三子俱幼。唐大來名泰選。貢。以養母繳引。詩畫書俱得董元宰三昧。余在家時。陳眉公即先寄以書云。良友徐霞客。足跡遍天下。今來訪難足。并大來先生。此無求於平原君者。幸善視之。比至滇。余囊已罄。道路不前。初不知有唐大來可告語也。忽一日遇張石夫。謂余曰。此間名士唐大來。不可不一晤。余遊高堯時。聞其在傅元巘別墅。往覓之。不值。還省。忽有揖余者曰。君豈徐霞客耶。唐君待先生久矣。其人即周恭先也。周與張石夫善。與張先晤。唐即以眉公書誦之。周又為余誦之。始知眉公用情周摯。非世誼所及矣。大來雖貧。能不負眉公厚意。因友及友。余之窮而獲濟。出於望外。如此。唐大來。其先浙之淳安籍。國初從戎於此。曾祖金。嘉靖戊子鄉薦。任邵武同知。從祀名宦。祖堯官。嘉靖辛酉解元。父懋德。辛卯鄉薦。臨洮同知。皆有集。唐君合刻之。名紹箕。

堂集。李本寧先生為作序。甚佳。大來言歷數先世。皆一仕一隱。數傳不更。故其祖雖發解。竟不仕。而年甚長。今大來雖未發解。而詩翰為滇南一人。真不忝厥祖也。但其爵嗣未耀。二女俱寡。而又旁無昆季。後之顯者。將何待乎。大來之岳。為黃麟趾。字伯仁。以鄉薦任山東嘉祥令。轉四川順慶府。□□縣令。卒於任。即黃沂水禹甸之父。從月之兄也。其祖名明良。嘉靖乙酉鄉薦。仕至畢節兵憲。有牧羊山人集。大來昔從廣南出粵西。抵吾地。亦以粵西山水之勝也。為余言廣南府東半日多程。有寶月關。甚奇。從廣南東望。崇山橫障。翠截遙空。忽山間一孔高懸。直透中扃。光明如滿月。綴雲端。真是天門中開。路由其下盤躋而入。大若三四城門。其下旁有一窻。潛通滇粵之水。予按黃麟趾昭陽關詩注云。關口天成一石虎頭眈眈可畏。詩曰。何代鑿
窟通五丁輸地力。一窻自天工。域畛華與夷。當虎豹雄羣縕愁日暮。驅策亂流中。按昭陽即此洞也。唐君謂之寶月者。又其別名耳。此路東去即歸順。余去冬為交彝所梗。不能從此。盤龍山蓮峯祖師。名崇熙。元至正間。以八月十八日涅槃。作偈曰。三界與三塗。何佛祖不由。不破則便有。能破則便無。老僧有吞吐不下。門徒不肯用心修。切忌切忌。師素不立文字。臨去乃為此與遺蜕俱存。至今以此日為盤龍會云。邵真人以正初名璇。晉寧人。其父名仁。叔名忠。俱由蘇州徙此。閻老劉。挽忠詩有曰。三郎足下風雲達。忠子祀領鄉薦。小阮壺中

日月長人即真未句又曰。悵望蘇州是故鄉。見州志

晉時。晉寧之地曰寧州。南蠻校尉

李毅持節鎮此。討平叛酋五十八部。惠帝時。李雄亂。毅死之。女秀有父風。衆推領州事。竟破賊保境。比卒。羣酋為之立廟。是時寧州所轄之境雖廣。而駐節之地實在於此。至唐武德中。以其為晉時寧州統會之地。置晉寧縣。此州名之所由始也。州名宦向有李毅及王遜。姚岳等。迨萬歷間。吳郡許伯衡修州志。謂今晉寧州地已非昔時五十八部之廣。以一隅而僭通部之祀。非諸侯祭封內山川義。遂一併撤去之。并志傳亦削去。祗自我朝始。遂令千載英靈。空存盼鑒。一方故實。竟作灰塵。可歎也。然毅雖削。而其女有廟在古城。岳雖去。而岳亦有廟在州西。有功斯土。非豎儒所能以意滅者也。許伯衡謂昔時寧州地廣。今地狹。李毅雖嫡祖。晉寧不得而祀之。猶支子之不得承祧祀大宗也。余謂晉寧乃嫡冢。非支子。比毅所轄五十八部雖廣。皆統於晉寧。今雖支分五十八部。皆其支庶。而晉寧實承祧之主。若晉寧以地狹不祀。將委之五十八部乎。五十八部復以支分。非所宜祀。是猶嫡冢以支庶衆多。互相推委。而虛大宗之祀也。然則李毅乃一方宗祖。將無若毅之恫乎。故余謂唐晉寧唐大來。首以復祀李毅為正。

二十四日。街鼓未絕。唐君令人至。言早起觀天色。見陰雲釀雨。風寒襲人。乞再遲一

日候稍霽乃行。余謝之曰。行不容遲。雖雨不為阻也。及起。風雨淒其。令人有黯然魂銷意。令庖人速作飯。余出別唐大來。時余欲從海口安寧返省。完省西南隅諸勝。從西北富民觀螳螂川下流。而取道武定以往雞足。乃以行李之重者託大來。令人另齋往省。而余得輕具西行焉。方抵大來宅。報晉寧公已至下道。亟同大來及黃氏昆玉還道中。晉寧公復具酌於道。秣馬於門。時天色復朗。遂舉大觥。登騎就道。從西門三里度四通橋。從大道直西行。半里上坡。從其西峽轉而西南上。一里半。直躡望鶴嶺西坳。又西下涉一澗。稍北。即瀕滇池之涯。共五里。循南山北麓而西。有石聳起峯頭。北向指滇池。有操戈介胄之狀。是為石將軍。亦石峯之特為巉峭者。其西有廟北向。是為石魚廟。其西南又有山西突起。亞於將軍者。即石魚山也。又西二里。海水中石突叢叢。是為牛巒石。涯上鄰與鄉。俱以牛巒名。謂昔有衆牛飲於海上。子。應而不去。遂成石云。於是又循峽而南。二里逾平坡南下。有水一塘。直浸南山之足。是為三尖塘。塘南山巒高列。塘北度脊平行。脊之北即滇池。牛巒塘水不北洩。而東破山腋。始知望鶴之脈自西來。不自南來也。從塘北西向溯塢入。其塢自西而東。即塘水之上流也。三里。塢西盡處。有三峯排列其南。最高者即南山之再起者也。其中一峯。即自南峯之西。遼峽而北。峙為中峯焉。北峯則瀕滇池。而東度為石將軍望鶴山之脈矣。中峯之東。有村落當塢。

是為三尖邱。晉寧邱落止此。西沿中峰而上一里。與南峯對夾之中。復阻水為塘。不能如東塘之大。而地則高矣。又平上而西。一里。逾中峯之脊。從脊上西南直行。為新興道。渝脊西北下。即滇池南涯。是為昆陽道。而晉寧昆陽以是脊為界焉。於是昆陽新舊州治俱在一望。直下半里。沿滇池南山麓半西行。二里餘。有邱在北涯之下。滇池之水環其前。是曰赤峒裏。亦池濱聚落之大者。又西由邱後逾嶺南上。既西下。三里。有邱倚南山北麓。盤其嘴而西。於是西峽中開。自南而北。與西界山對夾成塢。其脊南自新興界分支北下。西一支直走。而為新舊州治。而北盡於舊寨邱。東一支。即赤峒裏之後山。濱池而止。東界短。西界長。中開平塢為田。一小水貫其中。亦自南而北入滇池。即志所稱渠濫川也。按隋書史萬歲為行軍總管。自靖蛉川至渠濫川。破三十餘部。當即指此。自東嘴截塢而西。正與新城相對。而大道必折而南。盤東界之嘴以入三里。始西涉塢。經塢三里。又隨西界之麓北出。一里半。是為昆陽新城。又北一里半。為昆陽舊城。於是當滇池西南轉摺處矣。舊城有街衢闡堵而無城郭。新城有樓櫓雉堞而無民廬。乃三四年前。舊治經寇。故卜築新邑而市舍猶仍舊貫也。舊治街自南而北。西倚山坡。東瞰湖溪。至日已酉是。亟飯於市。此州有天酒泉普照寺。以無奇不及停屐。遂北行。四里稍上。逾一東突之坳。其山自西界橫突而出。東懸滇海中。路逾其坳中北下。其北滇海復

嵌塢西入其突出之峯。遠眺若中浮水面。而其西實連綴於西界者也。乃西轉涉一塢。共四里。又北向。循滇池西崖山麓行。五里。又有小峯傍麓東突。南北皆湖山環抱。之數十家倚峯而居。是為舊寨邨。由邨北過一塢。其塢始自西而東。塢北有山。一派。亦自西而東。直瞰滇海中。北二里。抵山下。直躡山北上。一里餘。從崩崖始轉東向山半。行又里餘。從東嶺盤而北。其嶺南北東三面俱懸滇海中。正東與羅藏隔湖相對。此地杳僻隔絕。行者為畏途焉。嶺北又有山一支。從水涯之北。亦自西而東。直瞰滇海中。與此嶺南北遙對成峽。滇海驅納其中。外若環窩。中駢束戶。是為海口。南嶺北下之處。峻削殊甚。余慮日暮。驅馬直下。二里。復循塢西入。二里。西逾一坳。由坳西下。山塢環開。中為平疇。滇池之流。出海就峽。中貫成河。是為螳螂川焉。二里。有邨傍塢中南山下。過之。行平疇間。西北四里。直抵川上。有聚落成衢。濱川之南。是曰茶埠墩。即所謂海口街也。有公館在焉。監察御史案臨。必躬詣其地。為一邑水利所係耳。先是唐晉寧謂余。海口無宿處。可往柴厥莫。土官鹽肆中宿。蓋唐以代巡常宿其家也。余問其處。尚相去六七里。而日色已暮。且所謂海門龍王廟者。已反在其東二里。又聞阮玉灣言。有石城之勝。亦在斯地。將留訪焉。遂不復前覓逆旅投宿。二十五日。令二騎返晉寧。余飯而躡。北抵川上。望川北若崖壘空。川流直噬其下。

問所謂石城者。土人皆莫之知。惟東指龍王堂在盈盈一水間。乃溯川南岸東向從之二里。南岸山亦突而臨川。水反舍北而逼南。南崖崩嵌盤沓。而北崖則開遠而受民舍焉。是為海門邨。與南崖相隔一水。不半里。中有洲浮其吭間。東向溟海。極吞吐之勢。峙其上者。為龍王堂。時渡舟在邨北岸。呼之莫應。余攀南崖水窟。與水石相為容與。忘其身之所如也。久之。北崖邨人以舟至。遂渡登龍王堂。堂當川流之中。東臨海面。時有賽神者。浮舟而至。而中無廟祝。後有重樓。則阮祥吾所構也。廟中碑頗多。皆化治以後。撫按相度水利。開濬海口。免於汎濫。以成瀕海諸良田者。故巡方者以此為首務云。出廟渡北岸。居廬頗集。其北向所倚之山。有二重。第一重。橫突而西。多石。而西垂最高。即巖削而瀕於川之北岸者。第二重。橫突而東。多土。而東遠最遠。即錯出而盡為池之北圩者。二重層疊於邨後。蓋北自觀音山盤礴而盡於此。邨祇俱阮氏莊佃。余向詢阮玉灣新置石城之勝。土人莫解。謂阮氏有墳在東岸。悞指至此。邨人始有言。石城在里仁邨。其邨乃猶羅寨正於茶埠墩對。從此有小徑向山後峽中西行三里可至。余乃不東向阮墳。而西覓里仁焉。即由邨後北逾第一重石峯之脊。北向下路。旁多錯立之石。北亦開塢。而中無細流。一里。隨塢西轉。已在川北岸巖削石峯之後。蓋峯南漱逼川流。故取道於峯北耳。其內桃樹萬株。被隴連壑。想其蒸霞煥彩時。令

人笑武林天台為燭火矣。西一里過桃林則西塢大開。始見田疇交塍。流溪霍霍。邨落西懸北山之下。知其即為里仁邨矣。蓋其塢正南。矗立石山西盡於此。塢瀕於川。亦有一邨臨之。是為海口邨。與茶埠墩隔川相對。有渡舟焉。其塢之東北逾坡。塢之西北循峽皆有路。凡六十里而抵省會。而里仁邨當塢中北山下半里。抵邨之東。見流泉交道。山崖間樹木叢陰。上有神宇。蓋龍泉出其下也。東塢以無泉故。皆成旱地。西塢以有泉故。廣闊良疇。由邨西盤山而北。西塢甚深。其塢自北峽而出。直南而抵海口邨焉。邨西所循之山。其上多蹲突之石。下多崆峒之崖。有一竅二門。西向而出者。余覺其異。詢之土人。石城尚在塢西嶺上。其下亦有龍泉可遵之而上。共北半里。乃西下截塢而度。有一溪亦自北而南。中乾無流。涉溪西上。共半里。聞水聲泓泓。則龍泉溢西山樹根下。瀦為小潭。分瀉東南去。由潭西上嶺半里。則嶺頭峯石湧起。有若卓錐者。有若夾門者。有若芝擎而為臺者。有若雲卧而成郭者。於是循石之隙。盤坡而上。墜壑而下。其頂中窪石皆環成外郭。東面者。岝崿森透。西面者。穹覆壁立。南面則余之逾脊而下者。北面則有石窟曲折。若離若合間。一石墜空當關。下覆成門。而出入由之。圍壑之中。底平而無水。可以結廬。是所謂石城也。遙北門而北。其石更分枝簇萼。石皆青質黑章。廉利稜削。與他山迥異。有牧童二人。引余循崖東轉。復入一

石隊中。又得圍崖一區。惟東面受客如門。其中有趺坐之龕。架板之牀。皆天成者。出門稍南。廻顧門側。有洞岈然。亟轉身披之。其洞透空而入。復出於圍崖之內。始覺由門入。不若由洞入更奇也。計圍崖之後。即由石城中望。所謂東面巔峴處矣。出洞仰眺。洞上石峯層沓。高聳無比。復有一老猿羅。披獸皮前來。引余相與攀躋。其上如眾臺錯立。環中窪而峙其東。東眺海門。明鏡漾空。西俯窪底。翠瓣可數。而隔崖西峯穹覆之上。攢擁尤高。乃下峯復渡南脊。轉造西峯。則穹覆上崖。復有後層分列。其中開峽。東墜危坑而下。其後則土山高擁。負展於上。聳立之石。或上覆平板。或中剖斜櫺。崖脇有二小穴。如鼻孔。羣蜂出入其中。蜜漬淋漓其下。乃崖蜂所巢也。兩牧童言。三月前。土人以火熏蜂而取蜜。蜂已久去。今乃復巢矣。童子競以草塞孔。蜂輒嗡嗡作銅鼓聲。凭覽久之。乃循墜坑之北。東向懸崖而下。經東石門之外。猶令人一步一回首也。先是從里仁邨望此山。峯頂聳石一叢。不及晉寧將軍峯之偉杰。及抵其處。而閩闈曲折。層沓瓊瑤。幻化莫測。鍾秀獨異。信乎靈境之不可以外象求也。蓋是峯西倚大山。此其一支東竄。峯頂中坳。石骨內露。不比他山之以表暴見奇者。第其上無飛流涵瑩之波。中鮮剪棘梯崖之道。不免為兔狐所窟耳。老猿羅言。此石隙土。最宜茶。茶味迥出他處。今阮氏已買得之。將造菴結廬。招淨侶以開勝壤。豈君即其人耶。余